

# Акафист Господу Иисусу Христу Грядущему

## Кондак 1

Возбранный Воеводо и Господи, мира Создателю, с верою и любовью припадающе к Тебе Грядущему, вопию Ти: Иисусе, Господи Грядущий, вниди в дом души моя.

## Икос 1

Ангелов лики со страхом и трепетом взирали на Тя, Господи, егда волею нас ради распялся Еси; мы же грешнии что возможем глаголати? Но дерзаем по слову Твоему молитися Тебе: Иисусе, радости наша, яви нам милость Твою; Иисусе, любви неизреченная, даруй нам возлюбити Тя всем сердцем и всем помышлением. Иисусе, желание наше, не отрини нас, ищущих Тя; Иисусе, Свете Тихий, осияй нас светом благодати Твоея; Иисусе, надеждо наша, не остави нас заблуждающихся. Иисусе, вопрошающий нас: что творите вы на земли? — даруй нам творити Твоя повеления. Иисусе, не возбранивый имети образ Твой, даруй нам выну имети образ Тя Грядущаго. Иисусе, входящий в дома людей Твоих, вниди в мя и преобрази мя всего. Иисусе, даруй ми разумети, что есть благая воля Твоя; Иисусе многомилостивый, не отступи от меня за нерадение мое. Иисусе, Господи Грядущий, вниди в дом души моя.

## Кондак 2

Вем, яко велие утешение имам в последовании Тебе, Господи, даруй ми николиже отступати повелений Твоих, да спасаемый Тобою зову: Аллилуиа.

## Икос 2

Обещавый вечеряти с приемлющим Тя, соделай мя причастника вечери Твоея тайныя. Иисусе, стоящий и толкущий у двери сердца моего, даруй ми уразумети зов Твой; Иисусе, призывающий нас ко очищению, даруй ми познати нечистоту мою. Иисусе, Свете истинный, просвети мя, да возлюблю заповеди Твоя; Иисусе, ищущий призвати грешных, отверзи слух мой ко услышанию глагола Твоего. Иисусе, утружденный на пути Своем, не имеющий где главу преклонити, не возгнущайся вниди в дом мой. Иисусе, вем яко наг есмь, нищ и убог, но благодатию Твоею покрый мя. Иисусе, милосте безконечная, не остави мене; Иисусе, Огнь пожигающий, попали моя злыя помыслы. Иисусе, Врачу, исцели язвы страстей моих. Иисусе, вся могий, коснися очес моих, во еже не видети мне суеты; Иисусе премилостивый, очисти мя всего и спаси. Иисусе, Господи Грядущий, вниди в дом души моя.

### **Кондак 3**

Глаголавый пречистыми устами Твоими: ей, гряди скоро, аминь! даруй мне со возлюбленным учеником Твоим взывати: ей, гряди, Господи Иисусе! Сего ради в трепете ожидая пришествия Твоего, зову Ти: Аллилуиа.

### **Икос 3**

Призывай апостолов от сетей рыбарских на служение Истине Твоей, призови и мя от суеты житейской, да последую Тебе, с веселием и любовью глаголя: Иисусе, простивый ученику Своему трикратное отречение, даруй ми его покаяние; Иисусе, совесть моя, даруй ми горько плакаться о гресех моих. Иисусе, ни единым словом, но возрением токмо на ученика Своего приведи его к Себе, даждь и мне слезы покаяния, коснися души моя, да раскаюся о неправде моей. Иисусе, взираяй на произволение сердечное, помилуй мя. Иисусе, рекий апостолу Петру: гряди по Мне! повели и мне Тебе последовати; Иисусе, глаголавый: блажен еси, Симоне, вар Иона, яко исповеда Мя Сыном Божиим, — даруй и мне его исповедание истинное. Иисусе, разрешивый сему ученику идти по водам во сретение Твое, даруй и мне силу благодатную не убояться волн житейских; Иисусе, простерший руку к Петру утопающему, простри и мне руку помощи; Иисусе, рекий: кто не со Мною, тот против Меня, — даруй ми пребыти с Тобою. Иисусе, Господи Грядущий, вниди в дом души моя.

### **Кондак 4**

Возлюбивый, Господи, весь род человеческий, научи и мя возлюбити ближних моих, да просветлен и обожен Тобою, выну зову Ти: Аллилуиа.

### **Икос 4**

Призываяй всех труждающихся и обремененных ко упокоению, даруй ми потрудитися ради имени Твоего святого, не убоявшись зноя полуденнаго: не ведаю бо егда день мой к вечеру преклонится; и да вопию Ти: Иисусе, Свете святой, освяти повседневный труд мой; Иисусе, Утешителю, даруй ми николиже возскорбети о тягости труда сего. Иисусе, Радование мое, даруй ми понести всяку скорбь ради имени Твоего. Иисусе, даруй ми познати Царство Божие внутри себя. Иисусе, Господи Грядущий, вниди в дом души моя.

### **Кондак 5**

Се прихожду к Безсмертному Царю и Богу моему, вопия: Аллилуиа.

## **Икос 5**

Вем, Господи, яко скорбями, недугами и различными печалями болезни душ наших врачуеши. Со слезами вопию Ти: Иисусе, Господи, Ты Сам гонимый из храмов Твоих, даждь нам силу терпети скорби за имя Твое; Иисусе, Странником в мире являющийся, помози нам во изгнании и странствии нашем. Иисусе, Агнче Божий, вземляй грехи мира, возьми бремя грехов наших; Иисусе пречудный, страдания за мир претерпевый, утоли наши многоразличныя скорби. Иисусе, Странниче в мире утомленный, даруй покой утомленной душе моей. Иисусе, учеников призывый, даруй и мне небоязненно тещи за Тобою. Иисусе Господи Предвечный, благослови всех к Тебе стремящихся. Иисусе, вся ведущий, Ты веси яко люблю Тя; Иисусе, вся могий, помози ми и прости мя. Иисусе, Господи Грядущий, вниди в дом души моя.

## **Кондак 6**

Вем, Господи, яко тесными вратами, многими скорбями подобает внити в Царствие Небесное, — укрепи стопы наша, да не возвратимся вспять миром побеждаемии, но да зовем Ти: Аллилуиа.

## **Икос 6**

На вечери в дому Симона Прокаженного не отринул еси грешницу, пришедшую с миром многоценным помазати нози Твоя, но рекл еси: отпущаются греси ея мнози, яко возлюбила много. Иисусе благий, реки и о моих гресех такожде; Иисусе, Пастырю Добрый, призови мя яко заблудшую овцу; Иисусе, Судие Праведный, судом Твоим вразуми мя; Иисусе, ими же веси судьбами спаси мя. Иисусе, постившийся в пустыне и напоследок взалкавый, даруй ми истинное алкание правды Твоя; Иисусе, быв искушен всячески, помози ми во искушениях моих. Иисусе, рекий: не может человек творити ничесоже, аще не будет дано ему свыше, — пошли ми помощь Твою с небеси; Иисусе, не уклони сердце мое в словеса лукавствия; Иисусе, Помощь моя, Заступниче мой, Радование мое, спаси мя. Иисусе, Господи Грядущий, вниди в дом души моя.

## **Кондак 7**

Повелел еси, Господи, быть мудрыми, искупующе время, яко дние лукави суть и время сокращенно; вразуми мя, да спасаемый Тобою, вопию благодарне: Аллилуиа.

## **Икос 7**

Слыша Тайновидец апостол Иоанн глас с небеси глаголющий: напиши: блажени мертвии, умирающие о Господе отныне. Ей, глаголет Дух, да починут от трудов

своих: дела бо их ходят вслед с ними. Слыша сии слова и аз ужасаюся — не имам бо дел ко оправданию и ничто же благое сотворих. Сего ради от сердца вопию Ти: Иисусе, Судие Праведный, не осуди мя по делам моим. Иисусе премилостивый, виждь нерадение мое и зло, соделанное мною, но помилуй мя. Иисусе, не возгнущайся внити в оскверненный храм души моей; Иисусе Наставниче, научи мя. Иисусе, Сыне Божий, даждь ми нищему Твое богатство неизживаемое; Иисусе, соделай мя рабом Твоим. Иисусе, пусто изжих время многоценное, данное ми для спасения; Иисусе, прими мя, яко в единоедесятый час пришедшаго, и научи мя оправданием Твоим. Иисусе, Господи Грядущий, вниди в дом души моя.

### **Кондак 8**

Зриши, Господи, яко великою скорбию сердца человеческия исполняются о зле неверия во дни наши сущаго; сего ради, даруеши благодатное обновление икон святых в знамение обновления духа нашего; познав в сем всеблагое промысление Твое, благодарственно вопием Ти: Аллилуиа.

### **Икос 8**

Дано бысть видение возлюбленному ученику Твоему, яко под олтарем избиевших за слово Божие и за свидетельство еже имеяху, возопиша гласом велиим, глаголюще: доколе, Владыко Святый и Истинный, не судиши и не мстиши крови нашея от живущих на земли. И даны быта коемуждо их ризы белы, и речено бысть им да почиют еще время мало, дондеже скончаются и братия их имущии избиены быти яко же и тии. Слышав сие, возношу Ти скорбный глас мой: Иисусе Святый, утоли на земли нашей скорби великия; Иисусе Праведный, укрепи исповедников святых веры, ныне люте страждущих. Иисусе, по всей земли Российской проходящий, очисти ю Своими стопами; Иисусе, утомленный на пути Твоем, укрепи народ, от глада и болезней погибающий. Иисусе, Сам в нищете сый, укрой от холода и нищеты братию нашу; Иисусе, услыши вопль и плач народа русскаго. Иисусе, прими фимиам молитв святых, в тайне Тебе подвизающихся; Иисусе, ради сих праведных, помилуй нас. Иисусе, вем яко видиши всякую каплю слез на очах наших; Иисусе, даруй нам в терпении понести крест наш. Иисусе, вем яко слышиши каждое воздыхание скорби нашей, прими ю во очищение душ наших; Иисусе, вем яко вместо разрушенных храмов на земли Российской созидавши храмы нерукотворенныя душ человеческих, ими же да украсится Царствие Божие. Иисусе, Господи Грядущий, вниди в дом души моя.

### **Кондак 9**

Жажду просвещения Твоего, Господи, даруй ми жаждущему каплю благодати Твоя, да вопию Ти: Аллилуиа.

## **Икос 9**

Ангельския силы, серафимы и херувимы и вся воинства небесныя со страхом и благоговением взирают на великое смирение твое; Ты бо Господи Сил, Царь царствующих, Господь господствующих, смилив Себя и зрак рабий приим, по земли нашей скорбной шествуеши из града в град, из веси в весь, всех созывая Сам на вечерю, Тобою уготованную: Иисусе Благословенный, благослови всех призывающих Тя; Иисусе Благий, ко грешным пришедый, призови не ищущих Твоея помощи. Иисусе, Свете незаходимый, просвети сердце народа нашего во тьме неверия сушаго; Иисусе, Свете истинный, осияй страну русскую; Иисусе, не возбранимый детям приходите к Тебе, просвети детей невинных, в безверии воспитанных; Иисусе, в тайном подвиге на всяком месте, в лесах и весях Тебе подвизающихся — сохрани. Иисусе, Великий Архиерею, иереев верных мученическую кончину Тебе ради приемлющих — укрепи; Иисусе, светом благодати Твоея возсияй в сердцах гонителей, да познают Тя, Бога Истиннаго. Иисусе, к великому всенародному покаянию нас призови; Иисусе, состраждущий нам, горе народное, глад, нужду, тьму духовную развей невечерним светом Твоим. Иисусе, призови и мя убогаго, не дерзающаго приступити к Чертогу Твоему; Иисусе, просвети одеяние души моя, да вниду в онь. Иисусе, Господи Грядущий, вниди в дом души моя.

## **Кондак 10**

Ты рекл еси, Господи: Побеждающему дам сести со Мною на престоле Моем, яко претерпевши до конца, той спасен будет. Приемля сей глагол Твой в сердце мое, в радости духовной благодарственно вопию Ти: Аллилуиа.

## **Икос 10**

Виде апостол Иоанн народ мног, егоже исчести никто не может от всякаго языка, стоящ пред Престолом Божиим, и людей облеченных в ризы белы и слыша глас глаголющий: сии суть, иже приидоша от скорби великия и исправиша ризы своя и убелиша их в крови Агнца. Иисусе, Веселие Истинное, возвесели душу мою; Иисусе, сподоби и мя послужити Тебе, якоже сии искупленные от земли служат Ти день и ночь в Церкви Твоей. Иисусе, Творче мой, сотвори, да будет ми весь мир храмом Твоим; Иисусе, научи мя, да будет сердце мое престолом Тебе, и таинство жизни Твоея да совершается в нем. Иисусе Спасителю, приими от мене немощное славословие сие, яко "жертву хваления"; Иисусе, во святом причащении Тела и Крови Твоея освяти мя; Иисусе, Радосте моя, даруй ми, да в сердце моем благодарственно поклоняюся Тебе. Иисусе, Господи Грядущий, вниди в дом души моя.

## **Кондак 11**

В немощи человекей сила Божия совершается: аз немощен и духом и телом; но

укрепи мя и ободри мя благодатию Своею, да познав милость Твою, радостно воспою: Аллилуиа.

### **Икос 11**

Рекл еси учеником Своим и всем верующим: в мире скорбни будете, но скорбь ваша в радость будет. Вем бо, Господи, Тобою реченное и вопию Ти: Иисусе, мир Твой даруй душе моей. Иисусе, помози ми, да оставлю все ради Тебе; Иисусе, даруй ми узкими вратами прийти к Тебе. Иисусе, Свете Тихий, уготовь сердце мое на вечерю Твою; Иисусе, даждь ми все дни жизни моя послужити Тебе. Иисусе Благий, научи мя кротости и смирению, научи мя разумети нужду ближняго; Иисусе, не хотению своему, но благой воле Твоей да последую. Иисусе, скорби мира сего во спасение да послужат ми. Иисусе, Господи Грядущий, вииди в дом души моя.

### **Кондак 12**

Умиленным сердцем и духом радостию о Тебе исполненным предстою пред Лицом Твоим, поклоняюся милосердию Твоему и вопию: Аллилуиа.

### **Икос 12**

К горнице Сионской на тайной вечери глаголал еси учеником Своим: мир оставляю вам, мир Мой даю вам, не якоже мир дает, Аз даю вам. Да не смущается сердце ваше, ни устрашает. Слышав сие реченное Тобою, вопию Ти: Иисусе, укрепи мя на брань не с кровию и плотию, но с началами и с миродержателями тьмы века сего. Иисусе, научи мя прияти вся оружия Божия, да возмогу противиться в день лют; Иисусе, препояшь чресла моя истиною и облеки мя в броню правды; Иисусе, обуи ножи моя во уготовление благовествования мира; Иисусе, научи мя восприяти щит веры и шлем спасения. Иисусе, помози ми молитися молением на всяко время духом; Иисусе, умудри мя пребывати бдящим во всяком терпении; Иисусе, помози ми не угасити светильника души моя; Иисусе, даруй ми со светильником возженным внити в сретение Твое. Иисусе, Господи Грядущий, внити в дом души моя.

### **Кондак 13**

О, Иисусе Христе, Свете Тихий, осияй мя Истиной Твоею, да услышав зов Твой, со светильником горящим выйду во сретение Тебе, грядущему внити в дом души моя, поя Ти: Аллилуиа.

(Этот кондак читается трижды)

## **Икос 1**

Ангелов лики со страхом и трепетом взирали на Тя, Господи, егда волею нас ради распялся Еси; мы же грешнии что возможем глаголати? Но дерзаем по слову Твоему молиться Тебе: Иисусе, радости наша, яви нам милость Твою; Иисусе, любви неизреченная, даруй нам возлюбити Тя всем сердцем и всем помышлением. Иисусе, желание наше, не отрини нас, ищущих Тя; Иисусе, Свете Тихий, осияй нас светом благодати Твоея; Иисусе, надеждо наша, не остави нас заблуждающихся. Иисусе, вопрошающий нас: что творите вы на земли? — даруй нам творити Твоя повеления. Иисусе, не возбранивый имети образ Твой, даруй нам выну имети образ Тя Грядущаго. Иисусе, входящий в дома людей Твоих, вниди в мя и преобрази мя всего. Иисусе, даруй ми разумети, что есть благая воля Твоя; Иисусе многомилостивый, не отступи от меня за нерадение мое. Иисусе, Господи Грядущий, вниди в дом души моея.

## **Кондак 1**

Возбранный Воеводо и Господи, мира Создателю, с верою и любовью припадающе к Тебе Грядущему, вопию Ти: Иисусе, Господи Грядущий, вниди в дом души моея.

## **Молитва ко Господу Иисусу Христу Грядущему**

Господи Иисусе Христе, Сыне Божий, — поклоняемся Образу Твоему, любви Твоей и Промыслу Твоему о нас, грешных и недостойных рабех Твоих; услыши молитву нашу, с верою Тебе приносимую, прииди к нам, благодатию Духа Твоего Святаго научи, умудри пребывати в Тебе, яко же Ты пребываеши в нас; научи нас, Благий, молитве, добру и терпению; даруй нам дух сокрушения, дух покаяния; отыми от нас дух праздности, дух уныния и неведения. О, Иисусе Христе, Многомилостивый, Грядущий к нам, помилуй нас и спаси, молитвами Пречистыя Твоея Матери, ангелов и апостолов и всех святых Твоих, от века Тебе угодивших. Аминь.